

四庫全書

集部

# 欽定四庫全書

集部

御訂全金詩增補中州集卷四十三

詳校官中書

臣張虎拜

主事銜

臣徐以坤覆勘

總校官編修

臣

王燕緒

校對官編修

臣

勵守謙

謄錄監生

臣

黃嘉績

欽定四庫全書

御訂全金詩增補中州集卷四十三

李講議汾

二十五首 補一首

汾字長源平晉人系出鴈門曠達不羈好以奇  
節自許避亂入關京兆尹子容愛其才招致門  
下留二年去之涇州謁張公信甫一見即以上  
客禮之自是游道日廣然關中無一人敢與相  
軒輊者元光末用薦書得從事史館舊例史院

有監修宰相為之同修翰長至直學士兼之編  
修官專纂述之事若從事則職名謂之書寫特  
鈔書小史耳凡編修官得目錄分受之纂述既  
定以蒙授從事從事錄潔本呈翰長平居無事  
則翰長及從事或列坐飲酒賦詩一預史事則  
有官長掾屬之別長源素高亢不屑一世乃今  
以斗食故人以府史蓄之殊不自聊高張諸人  
率以新進入館史家凡例或未能盡知就其所

長且不滿長源一笑故刊修之際長源在傍則  
蓄縮慘沮握筆不能下長源正襟危坐讀太史  
公左丘明一篇或數百言音吐洪暢傍若無人  
既畢顧四坐漫為一語云看秉筆諸人積不平  
而雷李尤所切齒乃以嫚罵官長訟於有司然  
時論亦有不直雷李者故證左相半踰年不能  
決右丞師公以傷風化為嫌遣東曹掾置酒和  
解之不得已乃罷尋入關明年驅數馬來京師

日以馬價佐歡道逢怨家則畫地大數而去又  
明年恒山公仙在鄧之西山長源往說之署行  
尚書省講議官既而恒山與參知政事實哩相  
異同頗謀自安懼長源言論欲除之遁之泌陽  
竟為所害長源孝友廉介過人者甚多寧寒餓  
而死終不作寒乞聲向人人亦以此愛之平生  
以詩為專門之學其所得為尤多如洛陽才子  
懷三策長樂鐘聲又一年清鏡功名兩行淚浮

雲親舊一囊錢煙波蒼蒼孟津渡旌旗歷歷河  
陽城長河不洗中原恨趙括元非上將才三輔  
樓臺失歸燕上林花木怨啼鵑空餘一掬傷時  
淚暗墮昭陵石馬前同輩作七言詩者皆不及  
也辛卯秋遇予襄城盃酒間誦關中往來詩十  
數首道其流離世故妻子凋喪道塗萬里奔走  
狼狽之意雖辭旨危苦而耿耿自信者故在鬱  
鬱不平者不能掩清壯磊落有幽并豪俠歌謠

慷慨之氣此詩兵火中散亡今就其少作予所能記憶者錄之

補歸潛志李汾長源先名讓字敬之太原人少游秦中喜讀史書覽古今成敗治亂慨然有功名心工於詩專學唐人其妙處不減太白崔顥為人尚氣跌宕不羈頗褊躁觸之輒怒以是多為人所惡嘗以書謁行臺胥相國鼎胥未之禮也長源後投以書盡發胥過惡胥大怒然以其

士人容之元光間游梁舉進士不中能詩聲一  
日動京師諸公辟為史院書寫時趙間為翰林  
雷希顏李欽叔皆在院長源少不下之諸公  
怒將逐去亦不屑尋以病目免歸後入南京上  
書言時事不報出客唐鄧會北兵入境恒山公  
武仙署為掌書記在軍中金國亡長源勸仙歸  
宋未幾為仙麾下所殺年未四十哀哉平生詩  
甚多不自收集故往往散落其再過長安有云

三輔樓臺失歸燕上林花木怨啼鵲空餘一掬  
傷時淚暗墮昭陵石馬前望少室云圭影靜涵  
秋氣老劍鋒橫倚斗杓寒夏夜云鴉銜暝色投  
林急螢曳餘光入草深鸛雀樓云白鳥去邊紅  
樹小斷雲橫處碧山多樂府歌行尤雄峭可喜  
補歸潛志南渡後士風甚薄一登仕籍視布衣  
諸生遽為兩途至於徵逐游從輒相分別故布  
衣有事或數謁見在位者在位者相報復甚希

甚者高居臺閣舊交不得見故李長源憤其如此嘗曰以區區一第傲天下士耶已第者聞之多怒至逐長源出史院又交訟於官士風如此可歎

陝州

黃河城下水澄澄送別秋風似洞庭李白形骸雖放浪并州豪傑未凋零十年道路雙蓬鬢萬里乾坤一草亭八月峻陵霜樹老傷心休折柳條青

州北

州北光風艷綺羅南來扈從北人多梨園法曲懷奴舞  
月窟新聲倩女歌紫禁衣冠出金馬青樓阡陌瞰銅駝  
薄游却憶開元日常逐春風醉兩坡

再過長安

細柳斜連長樂坡故宮今日重經過一時人物存公論  
萬里雲山入浩歌白髮歸來幾人在青門依舊少年多  
自憐季子貂裘敝辛苦燈前讀揣摩

汴梁雜詩四首

天津橋上晚涼天鬱鬱皇州動紫烟  
長樂觚稜青似染建章馳道直於絃  
犬牙磐石三千國聖子神孫億萬年  
一策治安經濟了漢庭誰識賈生賢

琪樹明霞五鳳樓夷門自古帝王州  
衣冠繁會文昌府旌戟森羅部曲侯  
美酒名謳陳廣座凝笳咽鼓送華輶  
秦川王粲何為者憔悴羈塵坐白頭

樓外風煙隔紫垣樓頭客子動歸魂  
飄蕭蓬鬢驚秋色

狼籍麻衣浣酒痕  
天塹波光搖落日  
太行山色照中原  
誰知滄海橫流意  
獨倚牛車哭孝孫

寥落關山對月明  
客窓遙夜夢魂驚  
二年岐下音書絕  
八月河南風露清  
冉冉暮愁生草色  
迢迢秋思入蟲聲  
誰知廣武英雄歎  
老却窮途阮步兵

上清宮三首

憶昔秋風從茂陵  
詞臣忝預漢公卿  
瑤池宴罷西王母  
翠輦歸來北斗城  
石馬嘶殘人事改  
劫灰飛盡海山平

唯餘太一池邊月伴我驂鸞上玉京

蒼梧雲氣赤城霞  
綿絡鈞天帝子家  
仙掌高承九霄露  
霓旌遙駐五雲車  
昆明火劫驚人世  
瀛海風濤撼客槎  
醉裏忽逢王子晉  
玉笙吹落碧桃花

千劫塵緣謝吏曹  
道山仙闕事遊遨  
樓臺縹渺滄溟潤  
宮殿森羅紫極高  
幾代雲孫接仙李  
千年王母醉蟠桃  
詩成便欲還山去  
猶待君王賜錦袍

避亂陳倉南山回望三秦追懷淮陰侯信漫賦長

句

憑高四顧戰塵昏  
鷄野山川自吐吞  
渭水波濤喧隴阪  
散關形勢輒興元  
旌旗日落黃雲戍  
弓劍霜寒白草原  
一飯悠悠從漂母  
誰憐國士未酬恩

雪中過虎牢

蕭蕭行李戛弓刀  
踏雪行人過虎牢  
廣武山川哀阮籍  
黃河襟帶控成臯  
身經戎馬心逾壯  
天入風霜氣更豪  
橫槊賦詩男子事  
征西誰為謝諸曹

清明

鳴珂振轂滿重城春日綿綿老燕鶯人在碧雞坊外住  
澹隨流水過清明

下第

學劍攻書漫自奇回頭三十六年非春風萬里衡門下  
依舊井州一布衣

礪溪

封侯輸與曲如鉤冷坐礪溪到白頭老婦厨中莫彈鋏

白魚留待躍王舟

感遇述史雜詩五首

并引

正大庚寅予行年三十有九獻賦明廷為有司所病  
遂有不遇時之歎皂衣斗食從事史館以素非所好  
愈鬱鬱不得志臥病中僻居蕭條盡日無來人緬惟  
先哲凡所以進退出處之際窮達榮辱之分立身行  
道建功立事關諸人事者竊有所感焉於是始自騷  
人屈平以來下逮漢晉隋唐諸公終之以遠祖鴈門

武皇作為述史詩五十首以自慰其羈旅流落之懷  
述近代則恐涉時事故斷自唐以下不論嗚呼三百  
篇大抵皆聖賢感憤之所為作也余以愚忠謬信獲  
譏於斯世久矣非敢示諸作者庶幾後世有揚子雲  
者出或能亮予之宿心是歲秋七月既望并州人李  
汾引

蘇客卿秦

游說諸侯獲上卿賈人脣舌事縱橫可憐一世癡兒女

爭羨腰間六印榮

韓淮陰信

仗劍淮陰去復還  
舉頭西望識龍顏  
堂堂竟握真王印  
未害男兒辱胯間

叔孫奉常通

秦時博士魯諸生  
漏網驪山百丈阮  
邂逅劉郎習綿蕞  
便能彈壓漢公卿

馬中令周

腳踏長安陌上塵布衣西上欲誰親  
君王不省常何策憔悴新豐一旅人

遠祖鴈門武皇

死心唐室正諸侯鐵馬南來隘九州  
當日三垂岡上意諸孫空抱腐儒羞

擬張水部行路難

洛陽行人心欲折半年西州信音絕  
彈箏峽口兵塵高半夜心懸隴山月  
君不見嗷嗷失羣鳥淚盡眼流血潼

關書閉漢使稀安得慰我生離別

雲溪曉汎圖

曉景澹明月落影潭西丘晴川挂煙樹光拂雲河流楓  
林入行色關山生白頭羨羨畫中人憶我秦川游君帆  
渺何許儻下滄浪洲滄浪吾有約寄謝同盟鷗

古月一篇為裕之賦

古月天不收敵君三萬秋天孫弄明鏡光湧雲間流憶  
昔放逐江南州金陵女兒歌樵謳草裏烏紗巾散著紫

綺裘酒酣把玉笛直欲捫參歷井騎斗牛醉中呼兒搖  
雙舟吾欲乘流下石頭起來茫茫視八極萬里只有元  
丹丘丹丘子游人間風塵何為復往還玉華山人近招  
我九日朝帝蒼梧山

西歸

擾擾王城足是非不堪多病決然歸只因有口談時事  
幾被無心觸禍機日暮豺狼當路立天寒鵬鷃傍人飛  
終南山色明如畫何限春風筍蕨肥

避亂西山作

三月都門晝不開，兵塵一夕捲風回。  
也知周室三川在，誰復秦庭七日哀。  
鵝啄新豐下，陽翟草銜冤血上琴臺。  
夷門一把平安火，定逐恒山候騎來。

柳塘

長安西望少城隈，楊柳陂塘手自栽。  
渭水波光搖草樹，終南山色入樓臺。  
平生事業書千卷，浮世功名酒一杯。  
我亦陸渾山下去，擬尋佳處斲莓苔。

附鄆縣志柳塘在鄆縣終南山下紫陽楊先生  
與隱居講學於此門人百人植柳千株號曰柳  
塘中有清風閣紫陽泉李汾嘗賦詩於此

附咸寧志臘脂坡即翡翠坡或云與翡翠相接  
李長源詩所謂薄遊却憶開元日常逐春風醉  
兩坡也

李戶部獻甫 一十三首

獻甫字欽用欽叔從弟也凡欽止欽若皆中朝

名勝家故將種而同時四進士人門之秀照映  
一時欽用博通書傳於左氏及地理之學為精  
為人有幹局心所到則絕人遠甚故時人有精  
神滿腹之目歷咸陽簿辟行臺掾屬正大初夏  
人請和朝廷以馮子駿往議欽用預行夏使有  
口辯馮善人無以折之往復之際至以歲幣為  
言欽用不能平從旁進曰夏國與敝邑和好百  
年今雖易君臣之名而為兄弟之國使兄而輸

幣寧有據耶曰兄弟且不論宋日曾與吾家二十五萬匹典故具在君獨不知耶金朝必欲修舊好非此例不可欽用作色曰使者尚忍言耶宋以歲幣餌君家而賜之姓岸然以君父自居夏國君臣無一悟者誠謂使者當以為諱乃今公言之使者果能主此議以從賜姓之例敝邑雖歲捐五十萬某請以身任之夏使語塞和議乃定使還朝廷錄其功授慶陽總帥府經歷官

尋辟長安令京兆行臺所在供須之繁急於星火欽用所以處之者常若有餘縣民賴之以安入為尚書省掾壬辰之兵奏充行六部員外郎守備之策時相倚任之以功遷鎮南軍節度副使兼右警巡使車駕東巡死於蔡州之難時年四十所著詩書文號天倪集者留京師欽用死其家亦破非同年華陰王元禮購得之幾有人琴俱亡之恨然則文字言語之傳與否亦有數

存於其間耶

夏夜

銀河淡淡沒疎星  
一陣涼從雨後生  
仰看浮雲成獨臥  
數圍蛛網絡中庭

九龍池春望

五年外地看清明  
袖手低回過客亭  
謝絮楚萍無定著  
春光如我更飄零

興慶池書所見

短短菰蒲刺水青  
翠萍開處鑑波明  
畫船轉過垂楊外  
水面風來聞樂聲

題黃華幽居圖

層層佛屋貼山腰  
山下幽居勝午橋  
物外人  
家無稅役  
閒中生理足  
漁樵鴈踰遠  
障凌空迴人  
與高秋共寂寥  
何處人間景  
如此便應歸  
隱不須招

長安行

長安道無人行  
黃塵不起生榛荆  
高山有峰不復險  
大

河有浪亦已平向來百二秦之形祇今百二秦之名我  
聞人固物乃固人不為力物乃傾將軍誓守不誓戰戰  
士避死不避生殺人飽厭敵自去長安有道誰當行黃  
塵漫漫愁殺人但見蔽野雞羣鳴河東游子淚如雨眼  
花落日迷秦城長安道無人行長安城中若為情

別春辭

東皇按轡來何遲人間二月才芳菲六十日春能幾時  
不如意事常相隨一聲啼鴉花片飛把酒却與春別離

春緩歸聽我歌滔滔歲月如流波貴憂孰與賤樂多吾  
寧不欲列華鼎馳鳴珂香屏倚妓薦綺羅人生賦分有  
定在誰能買愁費天和長安市上酒如海跨驢徑上厓  
脂坡酒酣酣舞雙婆婆春自來去如予何

秋風怨

疎星耿耿明天河夜涼翠幕生微波碧梧委葉傳金井  
一夕秋風將奈何春風令人和秋風感人悲妾愁自與  
秋風期秋風爭管人別離燈炮垂紅粉泥暗龜甲屏風

雲影亂絡緯弔月啼不斷蓮漏壓荷夜未半涼颼蕭蕭  
入疎竹枕底寒聲碎瓊玉敲愁撼睡睡不明花露盈盈  
泣魚目秋風且莫吹念妾守空閨嫁狗隨走雞隨飛九  
死莫作蕩子妻郎薄倖妾薄命花自無言絮無定碧雲  
暮合郎未歸幾度粧成掩明鏡

河上之役三首

河堤一決豈天窮失在當年固白公誰與麻岡開故道  
暫教版籍見山東

新築河堤要策勲萬人採淨北壩新青青好藉曹州柳

舊是中原一段春

曹陷沒已久

萬夫卷土障橫流負土成山水未收明日落成真盛事  
誰能作賦擬黃樓

圍城

碧樹蒼烟起暮雲長安陌上斷行人百年王氣餘飛觀  
萬里神州隔戰塵身與孤雲向雙闕愁隨落日到咸秦  
山河大地分明在莫為時危苦愴神

驟雨

龍戰雲鏖勢未休  
鞭驅雷電走蛟虬  
望中雨脚橫天落  
觸處湍聲卷地流  
梁苑樓臺失炎暑  
漢家城闕動高秋  
若為藉得天瓢去  
倒瀉明河淨九州

資聖閣登眺同麻杜諸人賦

高閣凌雲眼界寬  
野烟碧樹有無間  
天邊孤鳥飛不盡  
陌上行人殊未還  
魏國幾回時事改  
汴堤千古夕陽閒  
愁來重倚闌干望  
崧少西頭是故山

遽然子趙滋 一首

滋字濟甫本出馮翊其祖貞元間來為南京漕  
司戶籍判官卒官下妻子不能歸遂為汴人濟  
甫少日出閭里間其曉音律善談笑得之宣政  
故家遺俗者為多及長厭於游蕩乃更折節取  
古人書讀之學書學畫學詩學論文立志既堅  
力到便有所得為人強記默識不遺微隱唐以  
來名人詩文往往成誦如目前考論文義解析

脉絡殆若夙昔在文字間者畫入能品詩學亦有功如黃石廟等作今代秉筆者或亦未可輕議間聞趙公書法為今代第一手學者多倣之但得其形似而已濟甫筆勢飛動頗得公不傳之妙宗室胙公文采風流照映一時而濟甫以布衣從之游商畧法書名畫胙公亦以真賞稱焉隆德太一故宮樓觀臺沼門戶道路花木水石悉能歷數之聽者曉然如親到其處至宋名

賢所居第宅坊曲與其家行輩羣從孫息姻婭  
排比前後雖生長鄰里不加詳也嘗往長清一  
禪寺與僧談僧言五派傳授圖大不易作濟甫  
笑曰易與耳因索筆作圖坐中他日以舊本證  
之不毫末差也丁酉歲歿於東州時年五十九  
附元好問遽然子墓碣銘泰和以來天下以能  
書稱者禮部閒閒趙公學者多倣之但得其形  
似而已南渡後始有遽然子以遽然子筆勢飛

動得公不傳之妙故一時學公者皆不及而公亦有吐吐逼人之歎宗室胙國公文采風流照映一時而遽然子乃得以布衣從之遊與之商畧法書名畫筆虛筆實之論獨得於任南麓王黃華之後若有真贋則望而知之胙公亦以真賞稱焉予官京師始用二公意交之而未款也亂後予客冠氏遽然子亦來東州每見之必連日竟夕而不忍去予居東州久將還太原行有

日遽然子聞之誦予詩文恨相見之晚而相從之不得久也為之泣數行下丁酉冬復來東州而遽然子已下世數月矣其壻商挺孟卿為予言予已北歸遽然子為之飲食不美者數日家人輩問言元子得歸在渠為可喜事而公為之損眠食何也遽然子曰是豈兒輩所能知也哉他日孟卿示予遽然子故書凡予所談往往記之紙墨間予詩文則間亦記之也因竊為慨歎

遽然子平生交不苟合人與之言一不相入挾  
杖逕去不返顧其所以愛我者乃如此子愚謬  
不足比數何以得遽然子如此哉天下愛予者  
三人李汾長源卒愿敬之李獻甫欽用是三人  
者皆有天下重名然長源獲死西山獄中敬之  
則被掠而北為非類所困折死於山陽欽用從  
死淮西時年未四十也予常以三人者之後當  
無有收衆人之所棄曲相獎藉如渠輩者晚節

末路乃復有一遽然子思欲與之隣屋相往來  
杯酒相樂就渠所談如東京故事悉記錄之曾  
不五六年而又若有物奪之而去者豈予賦分  
單薄善於招殃致凶所與遊者皆為所延及邪  
不然何奪吾遽然子之遽也遽然子諱滋字濟  
甫姓趙氏本出馮翊其大父天會貞元間來為  
汴梁戶籍判官卒官下妻子不能歸遂為汴人  
父諱青字漢卿遽然子三男長某次某兵亂中

所失小子尚幼二女次即孟卿所娶者遽然子  
春秋五十有九以病終權葬於東平沂州門之  
外若干步庚子歲除日予實銘之其銘曰積之  
之深守之之堅傳人之所不傳兼人之所獨專  
自拔泥塗如蛻而仙文以表之慰彼下泉顧雖  
愛我豈以一言而敢私焉

### 黃石廟

狂豪擊車代無人神石一砭志乃信吹噓風雲遮楚秦

炎精熾然四百春一編尚悵續後塵江山有待終此身  
望望久愁橫目民朝陽淒淒霜未休江燕竟來江北游  
山回鼎移海橫流天風何時清九州草泥自古踰王侯  
神棄不卹誰當羞割牲醺酒空千秋

元格

遺山父中州集作先  
大夫詩四十三首

鄉先生權參知政事代郡楊公叔玉謨先人墓  
銘今畧載於此先生姓元氏字德明秀容人唐  
禮部侍郎次山之後自幼讀書世俗鄙事終其

身不挂口為人誠實樂易洞見肺腑雖童子以  
言欺之亦以為誠然也先大夫歿遺產無幾先  
生布衣蔬食處之自若家人不敢以生理累之  
僮奴有竊拾東家之棗者立命還之貧人負債  
則往往令折券以貸之也累舉不第放浪山水  
間未嘗一日不飲酒賦詩春秋四十有八終於  
家先生作詩不事彫飾清美圓熟無山林枯槁  
之氣居東山福田精舍首尾十五年東巖其自

號也有集三卷藏於家銘曰貪夫徇財智士死  
名宇宙古今萬轍混并我機弗張我戶弗扃天  
宇泰然物莫敢撓飲芳食菲巖岫杳冥玉佩瓊  
琚御風泠泠魯山之醇次山之清閱世幾傳猶  
有典刑邈哉先生明昌承安間科舉之學盛大  
夫士非賦不談人知先生有聲場屋間其以詩  
文為業則不知也先人捐館後十年好問避兵  
南渡游道日廣世始知有元東巖之詩楊尚書

之美云彼美元夫子學道知觀瀾孔孟澤有餘  
曾顏膏未殘林觀察顯卿云文章變古名新體  
孝弟傳家守舊規雷內翰希顏云詩句妙九州  
孝友化一川王右司仲澤云讀書楓樹林曳杖  
白石灣至今文彩餘虎子仍斑斑李長源云衣  
冠巢許自高雅巖壑夔龍非棄捐餘人不能悉  
記家集亂離已來凡三失之今所存者特吾益  
之兄及門生輩所記憶者耳小子不肖暗於事

機不能高蹈遠引戀嫪升斗微俸萬一以取繫  
維之禍殘息奄奄朝夕待盡誠懼微言將絕謹  
以古律詩四十首附之中州集之癸冊庶幾來  
者知百餘年間作詩如先人而人或未之見其  
餘抱一槩之操泯泯默默終老而無聞者豈勝  
計哉是又可為歎也

德明名格本元  
郝經遺山墓誌

桃源行

山中三月山桃開紅霞爛漫無邊涯

音崖

山家藏春藏不

得落花流水人間來憶昔攜家竄巖谷秦人半向長城  
哭回頭塵土失咸陽繒弋徒勞羨鴻鵠冬裘夏葛存太  
朴小國寡民皆樂俗晝永垣籬雞犬聞春晴門巷桑榆  
綠漁郎偶到本無心仙境何緣得重尋今日武陵圖上  
看唯見雲林深復深

送德溫同舍赴簾試

太常侍祠水蒼珮內相夜下金蓮燭皇家結網未曾疎  
亦有佳人在空谷一從唐賦變遼律仰視折楊猶雅曲

雲臺勲業一青衫被髮操戈踵相屬筋疲力涸僅乃得  
墨水一升凡幾辱英雄俛首入彀中舉世悉然非子獨  
子家口衆親又老歲月旨甘須寸祿薦書聞說過南宮  
冷暖人情到僮僕我初與子偕計吏人後人前隨碌碌  
不慙齊客售鼓瑟頗為荆人悲獻玉一詩今日送君行  
萬里秋風看鴻鵠功名前路知不免雞黍後期良未卜  
錦標無用咤龍頭帛書且當傳鴈足

雨後

十日山中雨今朝見夕陽乾坤覺清曠草棘有輝光竹  
影搖殘滴松聲送晚涼南窓聊自適無用說羲皇

覽鏡

四十宜未老年年添鬢絲直教隨牒去也是挂冠時臺  
閣多新賦山林有逸詩悠然一罇酒滿酌不須辭

室人生朝

新酒清渾共糟牀洗盞嘗平時唯欲醉此日重難忘容  
服慙王霸山林得孟光白頭翁與媪萬事聽諸郎

太原古城惠明寺塔秋望

西山萬古壯陪京一日汾流入廢城浩浩市聲爭曉集

的的原隰但秋耕晉公老去詩仍在

晉公晉陽官舍春日詩云白頭官舍

裏今日又春風

越石亡來恨未平千尺浮圖暮烟底瓦盆濁酒

為誰傾

薄遊同郝漕子玉賦

全晉山河百戰場登臨歷歷見興亡夷居厖雜尤堪歎  
霸氣沈雄亦未量石爰烟霞詩秀潤駘祠風月酒淋浪

書生不是功名具，慙媿山翁問葛強。

山中秋夕

黃卷存餘習，青燈共晚涼。只知書味永，不覺鬢絲長。老  
檜千年物，幽蘭一國香。平生陶靖節，此夕邈相望。

寄宗人彥達

交城人

杯酒無緣接舊歡，空將書尺問平安。要君知我詩成處，  
落日西風正倚闌。

榴華

山茶赤黃桃絳白戎葵米囊不入格庭中忽見安石榴  
歎息花中有真色生紅一撮掌中看摹寫雖工更覺難  
詩到黃州隔千里畫家辛苦費鉛丹

過鳳凰山

在鴈門

鳳凰聞說似天壇北去南來馬上看想得松聲滿巖谷  
秋風無際海波寒

瓶形嶺早發

在繁時界

海雲蕭瑟雪花乾人在羊腸百八盤閒客不知名利苦

見時應作畫中看

寒食再遊福田寺

春山寂寂掩禪扉，複嶺盤盤入翠微。  
布鞵青鞵供勝踐，粥魚齋鼓薦玄機。  
日烘幽徑綠煙煖，風定曉枝紅雨稀。  
曾是西山讀書客，不應啼鳥也催歸。

家園假山

八尺飛來峰蒼然，立於獨細看甲乙。  
字疑是平泉族山，非一草石見石山亦足。  
便恐東岫雲來我，簷下宿今朝。

鑿盆池明朝種松菊自笑佳山人何時返巖谷

同侯子晉賦鴈

沈沈江浦雲浩浩朔漠雪微生幾寒暑翅老飛欲折樓  
中見新過夕照送明滅歌枕數聲來疎窓耿殘月悲鳴  
或天性南北隨所愜誰念孤旅人年年為愁絕

寒林圖為侯子晉賦

川光茫茫風景暮一雪無情天地素長安閉門千萬家  
亦有行人踏長路新豐煙火灞橋水畫史工作荒寒趣

雪中故事知幾何偏識詩翁忍寒處君不見淮西城下

鷺鷥鳴官軍夜斫吳家營只如党家麤俗亦不惡銀燭

金荷天未明拈出新詩三十韻蹇驢席帽可憐生

雪詩三十

韻見坡集

贈答彥文相過之什

程太原人

剝啄誰叩門開門得吾友握手一大笑慰我離羣久之

予富才具事業可力取瞻望青松姿衰遲愧蒲柳金閨

滿駕驚什伯自為偶寂寞林野人過從但鄰叟盤飧無

兼味筍蕨才適口窮達俱偶然相逢且杯酒

枕上

往時見白髮談笑輕歲月誰謂明鏡裏蕭蕭不勝簪  
山林蹉跎久世慮初未絕觸物重興懷忽忽不自愜遭逢  
有奇耦才用隨巧拙如何杜陵叟自比稷與契茫茫撫  
塵編何時卒吾業

秋暮王氏園亭

細徑雲林底危亭澗水湄秋先隕黃葉寒未老紅葵嚼

句幽禽答尋花晚蝶隨無人共幽興思與野僧期

六言

北闕三臺五省東山萬壑千巖  
琴書中有真味風月外  
無多談

山園梨葉有青紅相半者戲作一詩

霜輕霜重偶然中一葉雖殊萬葉同  
不信世間閒草木  
解隨兒女作青紅

詩

少有吟詩癖吟來欲白頭科名不肯換家事幾曾憂舍  
咀將誰語研摩若自訾百年間伎倆直到死時休

罇酒

土灰論遠計木石笑浮生但有一罇酒何須千載名

憶山中二絕句

東寺留連飲張園爛漫遊兒童望歸路一日幾登樓  
秋色山中好山翁醉不迴不知籬下菊霜後幾叢開

山中雨後

遶屋湍聲轉  
臨崖老樹推  
雷轟一雨去  
雲擘兩山開

遣興

張翰一杯酒  
林逋千首詩  
性惟便自適  
材敢論時施  
狡兔從三窟  
鷦鷯分一枝  
青山有佳色  
只似往年時

發冀州留別恩禪師

詩拙非同社  
情親本故鄉  
共知成遠別  
且復暫相將  
池古蓮花淨  
窓深檜葉香  
何時重攜酒  
來宿贊公房

貴公子詠

高堂紅燭鼓聲齊舞遍纖腰月未西一曲纏頭一雙錦  
驂騑空自惜障泥

蓮葉觀音恩禪師所藏同路宣叔賦

瑞相分明一葉中華嚴性海共圓通補陀自有丹青變  
畫史區區可得工

謝張使君夢弼餽春肉

牙豬肋厚一尺玉鹽花入深蒸脫骨韭芽蓼甲春滿盤  
走送茅齋慰幽獨山人食貧才一粥幾被艾生嘲苜蓿

食前方丈非素懷頗憶懸鉤繞高屋呼來鄰叟共一飽  
為說使君方繼肉饑民待哺今幾家無策贊君慙此腹  
區區一肉見歌詠說食書生良未足却愁今夕夢寐間  
有物踏破園蔬綠

仙雞詩

并序

繁峙義興鎮酒家韓氏子畜一雞以善鬪雄其鄉一  
日敵家以藥飼雞使不知痛求與韓雞對韓雞鬪久  
果被傷口下頷不收垂死矣一賣藥道人過其門曰

我能活此韓欣然使療之里中諸兒隨看者一二十輩皆使向壁立道人以雞置籠中探手良久若摩撫然者已而取瓢水啖之置瓢籠上即出門兒曹怪其久不還竊視之雞喙已復生矣道人布袍草冠腋下懸青囊落魄嗜酒夜宿寺閣上韓氏子與里中人奔走求之并所臥草薦不在矣是時明昌七年仲規弟為此鎮酒官予亦在焉作仙雞詩以記之

老雄健鬬夸擅場韓郎抱歸神色傷豈知黥兒出激倖

毒手一發不得防  
毳衣散灑尚可養  
利嘴一哆何由張  
青囊道人何許來  
自言救藥吾有方  
垂髯嚙水濯殘血  
半喙隨手生新黃  
筠籠半開聞膈膊  
草冠已往徒驚忙  
神仙世有寧虛荒  
惜哉詭激不可量  
世人驚勇天且剿  
況於物也資強梁  
敷榮枯枿變金石  
未若與世鍼膏肓  
何須變化示狡獪  
知君辦作淮南王  
蓬萊東望雲茫茫  
愛而不見心為狂  
刀圭不願換凡骨  
且欲共醉無何鄉

燈下讀林和靖詩

落葉落復落清霜今幾番  
疎燈照茅屋山月入顏垣  
老愛寒花淡幽嫌宿鳥喧  
卷中林處士相對兩忘言

觀西巖張永淳畫鴈

慘淡經營下筆難  
畫成不似卷中看  
知君連夜江湖夢  
折葦蕭蕭沙水寒

從趙敷道覓石榴

仙人囊中五色露  
得種昔與蒲桃俱  
猩猩染花開五月  
已覺秋實懸庭除  
張園一酸齒欲裂  
君家兩株蜜不如

竹馬兒童厭梨栗綠囊聊為剝紅珠

雪行

五更驢背滿靴霜殘雪離離草樹荒身在景中無句寫  
錯教人比孟襄陽

龍眠畫馬

驪黃求馬世皆然滅沒存亡自一天當日鹽車人不識  
只今空向畫中傳

歲暮

殺殺霜力勁沈沈山氣冥北風半夜起吹動一天星

送張冀州致政還都

狀元行簡之父

一札恩書下紫宸東門祖道畫圖新路人也解賢疏傳

河內猶思借寇恂父子文章千載事田園松菊自由身

玉京才過梨花節靈沼行春莫厭頻

用宋退傅張公閒遊靈沼探春回故

事

春雪

幾日韶華雪更侵龍公試手本無心寒留整整斜斜態

暖入融融洩洩陰著柳直疑香絮重擁堦還似落花深  
前頭桃李應無恙剩破相如買賦金

楸樹

道邊楸樹老龍形社酒澆來漸有靈只恐等閒風雨夜  
怒隨雷電上青冥

七夕

天河唯有鵲橋通萬劫歡緣一瞬中惆悵五更仙馭遠  
寂寥雲幄掩秋風

觀柘枝伎

腰鼓聲乾揭畫梁  
綵雲縈出柘枝娘  
簾間飛燕時窺影  
鑑裏驚鸞易斷腸  
輕細不妨重暈錦  
迴旋還恐碎明璫  
杖頭白雨催花急  
拂散春風兩袖香

附續夷堅志先人宰陵川泰和甲子元夕縣學  
燒燈有以杏棣棠枯枝為翦綵花者燈罷家僮  
乞之供於縣署佛屋中四月上七夜先夫人焚  
誦次乃見杏棠皆作花真贗相間先人會賓示

之以為文字之祥為賦瑞花詩予年始十五矣

附遺山集先東巖君生平愛鳳山

鳳凰山在鴈門

然竟

不一到故詩有鳳凰聞說似天壇北去南來馬

上看想得松聲滿巖谷秋風無際海波寒之句

予二十許時自燕都試乃與客登南樓亡友蘇

莘老閻德潤張九成王仲容輩說山中道人所

居有松風軒層簷高棟半出空際長松湍澗谷

如雲幢烟蓋植立闌楯之下山空夜寂石上聞

隆露聲使人耿耿不寐

附明一統志繫舟山在太原府城東北九十里  
禹治水繫舟此山故名有石如環軸曰繫舟鬼  
元好問父德明讀書其下趙秉文改曰讀書山  
好問詩從此晉陽方志上繫舟山是讀書山又  
云繫舟南北暮雲平落日滹沱一線明

附金詩紀事案中州集載楊叔玉墓銘云先生  
姓元氏字德明好問不敢名父故云爾金史傳

中不為詳著漫從中州集所載亦以字書失實  
甚矣山西舊志中每有金人元格詩始知德明  
名格也

元好古

五首

敏之諱好古性識穎悟讀書能強記務為無所  
不窺年二十就科舉時先東巖君已捐館太夫  
人年在喜懼望其立門戶為甚切及再上不中  
意殊不自聊又娶婦不諧日致惡語遂以狷介

得疾嘗作望月詩有莫怪更深仍坐待密雲或有暫開時之句人或言詩境不開廣非佳語也歎曰吾得年不永境趣能開廣否未幾沒於北兵之禍年三十一

中秋無月

佳辰無物慰相思  
玩賞空吟昨夜詩  
莫怪更深仍坐待  
密雲或有暫開時

讀裕之弟詩藁有鷓鴣聲柳巷深之句漫題三詩其

後

阿翁醉語戲兒癡說著蟬詩也道奇吳下阿蒙非向日  
新篇爭遣九泉知

鶯藏深樹只聞聲不著詩家畫不成慙愧阿兄無好語  
五言城下把降旌

傳家詩學在諸郎剖腹留書死敢忘  
先人臨終有剖腹留詩之語背

上錦囊三箭在直須千古說穿楊

題江村風雨圖

渡口舟橫水拍空墨雲傾雨樹號風江山不到紅塵眼  
半幅煙綃想像中



御訂全金詩增補中州集卷四十三

欽定四庫全書

集部

御訂全金詩增補中州集卷四十四

詳校官中書<sub>臣</sub>張虎拜

主事銜<sub>臣</sub>徐以坤覆勘

總校官編修<sub>臣</sub>王燕緒

校對官編修<sub>臣</sub>勵守謙

謄錄監生<sub>臣</sub>黃嘉績

欽定四庫全書

御訂全金詩增補中州集卷四十四

鶴鳴老人李俊民一

共七百零九首以下已借刻顧嗣立所錄元百家詩初選中

補俊民字用章別號鶴鳴老人唐韓王元嘉之後家於澤州少通程氏之學金承安中以經義舉進士第一應奉翰林文字未幾棄官教授南遷後隱於嵩山元世祖在藩邸劉秉忠盛稱之以安軍召見延訪無虛日遽乞還山卒賜諡莊

靜先生

集作莊靖

世祖嘗曰朕求賢三十年惟得竇

漢卿及李俊民二人澤守段正卿刻其遺集十

卷長平李仲紳王特升序之謂自筮仕後冥搜

隱索四十餘年雖片言隻字亦必有據劉瀛云

先生詩格律清新似東坡句法奇傑似山谷集

句圓轉脈絡貫穿半山老人之體也雄篇鉅章

奔騰放逸昌黎公之亞也蓋為當時所推重如

此先生嘗自書登科記後曰余闕承安庚申登

科記三十三人革命後獨與高平趙楠庭幹二  
人在一日邂逅於鄉邑哽咽道舊壬寅五月底  
幹復挈家之燕京感慨忍淚書五十六字寄之  
試將小錄問同年風采依稀墮目前三十一人  
今鬼錄與君雖在各華顛君還攜幼去燕然我  
向荒山學種田千里暮鴻行斷處碧雲容易作  
愁天是時蔡州失守已十年矣故云

毛晉卿肖山堂

悠然林下客世事頗能料  
間中意自適身外名肯釣  
卜居山之陽初為識者笑  
勢將陵岱華氣欲吞嵩  
少方尋愿谷歸稍近孫臺  
嘯微茫數烟岫巉絕對雲  
嶠為我增雙明未必在遠  
眺始雖如面友久得乃心  
照恐隨有力去或被移文  
誚已見成膏肓百計莫可  
療一時烟霞語慎勿駭廊  
廟咄哉肖山堂所以警不  
肖

母應之餉黍

憶昔周室衰周人詠黍離  
君今餉我黍為賦黍離詩  
厥

初藝黍時飯牛使牛肥八月黍未獲健兒驅牛歸健兒  
不滿欲我民還買犢今秋犢未大又被健兒逐健兒皆  
飽肉我民食不足食不足尚可鬻子輸官粟

游碧落

并序

壬寅重午日陪郡侯段正卿暨王用亨劉漢臣濟之  
君祥仲寬姚子昂張唐臣祿卿平陽趙君玉王潤之  
同行

浮雲翳炎景長夏愜幽事相陪林下友共造金碧地清

流漱寒玉老樹聳蒼翠何人開山祖妙處發天祕悠悠  
歲月深剝落磨崖字遨頭興不淺有酒留客醉幽鳥背  
人飛不慣聞鼓吹抵暮出山門溪風送歸騎

郭顯道美人圖

君不見昭陽殿裏蓬萊人終惹漁陽邊馬塵又不見吳  
宮夜夜烏棲曲竟使姑蘇走麋鹿移人大抵物之尤喪  
亂未免天公愁雖然丹青不解語冷眼指作鄉溫柔試  
問人間何處有畫師恐是傾國手却憐當日毛延壽故

寫巫山女麕醜

杜詩誰道巫山女麕醜何得此有昭君邨

宣差射虎

十二月初九日

北原風勁霜草枯  
草間出沒藏於菟  
眈眈來此被誰驅  
不妨邂逅馮婦車  
將軍膽氣勇有餘  
手中笑撚金僕姑  
等閒如射兔與狐  
兩眼錯莫精光無  
深山大澤失所居  
或撩汝頭編汝鬚  
可憐肉食無遠圖  
伎倆不及黔之驢  
羣鼠為耗而猫不捕

欺人鼠輩爭出頭  
夜行如市晝不休  
渴時欲竭滿河飲

饑後共覓太倉偷有時憑社竊所貴亦為忌器不忍投  
某氏終貽子神禍祐甫恨不猫職修受畜於人要除害  
祭有八蜡禮頗優近憐銜蟬在我側何故肉食無遠謀  
眈眈雄相猛於虎不肯捕捉分人憂縱令同乳不同氣  
一旦反目恩為讐君不見唐家拔宅雞犬上昇去彼鼠  
獨墮天不收唐公昉師李八百得其神丹遂舉家昇天雞犬皆去唯鼠空中自墮腸出一月三易  
其腸今山下有拖腸鼠東廣徽所謂唐鼠

埽晴婦

并序

世俗為埽晴婦者蓋假燮理之手導陰陽之和使民間免乾溢之患也感其事而賦之

卷袖褰裳手持帚挂向陰空便搔手前推後卻不辭勞  
欲動不動誰掣肘偶人相對木與土神女但誇朝復暮  
龍公不作本分事中間多少閒雲雨見說周人憂旱母  
寧知東海無冤婦慙慙更倩封家姨一時斷送龍回首

姚子昂畫馬

雄姿卓立開天骨騰踏萬里如神速可憐不遇九方臯

空使時人指為鹿自從大奴守天育無由更騁追風足  
中原一戰收乾坤白髮將軍髀生肉

苴履

待詔門前東郭趾藍關路上仙人迹雪花紛披蓋地白  
東家不借借不得雖然近市屨亦無以故為新即有餘  
同行留我木上座補過仰渠金十奴一生能著屨幾兩  
用心猶在阮孚上不須更覓下邳侯山林此計成長往

時守  
下邳

籌堂尋梅

蕭疎離落誰家圃尋芳信逐游蜂去眼前荆棘少人行  
馬蹏直到香來處怕愁貪睡獨開遲瘦損春寒鶴膝枝  
可是東君苦留客斜風細雨不堪詩

綵樓

并序

高平縣綵樓聞之舊矣今始親見議者猶謂高下侈  
麗不及向者三分之一因感而賦之

層層華構高且崇萬綵糾結填青紅何人下手奪天巧

都入意匠經營中書契以來未省見異事驚倒百歲翁  
郢斤般斧莫敢近卻立屏息慚無功寒窓戛戛鳴機婦  
積年杼柚一日空山川謂可錦繡裹塵土盡皆羅綺封  
前者攀轅後者挽奔車徑欲趨靈宮三年送迎禮雖舊  
人事不與天時同方當炎厲行夏令權勢大抵歸祝融  
神之於人無厚薄蓋以至誠能感通豚蹄豆酒道傍祝  
所獲神賜亦已豐閭閻疾苦還知否我為大夫歌大東

享炎帝  
閏年

上九里谷與濟之君祥仲寬李德方朱壽之姚子  
昂

太行巍巍形勢尊造物設險雄中原巨靈一朝擘石裂  
連峯忽斷開山門侵雲直上幾千尺挂壁一徑愁攀援  
十步回頭五步坐慄慄汗出如漿翻清風拔至最高頂  
下視寰海塵埃昏天壇咫尺若有待顧我不往慚食言  
世間好處豈不愛脚力雖盡心長存為君試寫遠遊興  
夜半月出清吟魂

與祁定之約  
游天壇不果

游濟源

并序

庚子春季與劉濟之君祥仲寬仲美姚子昂秦懿夫  
馬子溫李德方深之伯英朱壽之下太行抵覃懷望  
方口臨沅水二十三日丁亥郡侯段正卿因西山鎮  
轄回自析城來赴期值雨留宿奉仙觀翌日巳丑天  
霽具牲酒幣帛謁清源王廟禮畢會友人郭伯玉李  
慶之王天益史德秀王輔卿赫舍哩仲傑完顏壽之  
方外士祁定之郭道正元明道部將段玉等大飲於

裴公亭用麾下鼓吹以樂賓薄暮極歡而罷故賦之  
紀一時之勝游也

元戎小隊閒登臨悠悠旌旆穿山林太行南下路險澀  
不憚著腳窮幽尋清源祭秩世所重喬木掩映靈宮深  
是時方口雨初過天風破曉開微陰入門為問廟見禮  
白髮黃冠通古今且言享誠非享物那在與俗占浮沉  
鞠躬執簡默有禱脯酒縱薄神所歆幾年願違莫能遂  
至此始得償初心點檢圖經歎禹迹山青水綠無知音

竹根醉倒客星散夜聽波底蛟龍吟

河橋成

并序

橋成有日必有佳句寫河上逍遙之興贈子榮及督役楊成之

預積他山木重新兩岸隄龍依天上卧虹傍水心低不假鞭秦石何勞立蜀犀落成應有日誰向柱先題

乙未冬至

已應黃宮律初生復卦陽道隨天在北愁與日俱長節

物驚時換年光有底忙  
浮雲多變態試與問何祥

元夜有感

春城行欲遍百感到愁邊  
市冷猶燈火人稀尚管絃  
梅從今夜落柑憶舊時傳  
歸去西窓月無情照不眠

游青蓮

行處春風惡山中勝槩藏  
漸佳如蔗尾薄險似羊腸  
翠揖雙峯角清臨一水堂  
夜長僧睡少為我話興亡

過雲中

把酒不成醉出門行路難客愁千里破歸夢五更殘三  
仕有何喜一生常鮮歡恨無南去鴈為我報平安

宿海會寺二首

同孫講師明上人趙叔寶劉巨濟夜酌

佛堂光未放桑下喚難回是處皆堪歇何山不可開泉  
因龍吐出經自兔銜來徑向黃沙過尋僧問劫灰

青山雲水窟杖錫幾時來竹待香嚴擊松經道者栽西  
江無水吸震旦忽花開三笑圖中友同傾破戒杯

九里谷

九曲羊腸路千層劍戟山行鉤藤蔓刺坐印石花斑樹  
發三春暮雲歸萬壑間相陪林下屐雖倦不知還

獨坐

地偏無俗客日在掩柴扉暑退閒蒲扇涼生換葛衣風  
高雲散影露下月揚輝獨據胡牀坐心清即道機

乙亥過河

一身長道路四海尚風塵昔作依劉客今為去魯人渡  
河年在亥乞酒歲非申別後山中友相逢話又新

過星輶

古道開天險危峯拔地形連營南北戍過客短長亭野  
燒驚山鬼邊雲掩將星何人弄羌管哀怨不堪聽

用趙之美留別韻四首

把酒離筵且莫辭坐中瓜葛暫相依花從識後常含笑  
鳥自還時想倦飛往事微茫春夢斷故人牢落曉星稀  
天涯白髮禁愁得好在西山不早歸

長短亭中送別時問君東去復何依今宵明月三人共

來日紅塵一騎飛，傾蓋莫嫌相見晚。  
斷絃惟恨賞音稀，天涯盡道還家好。  
笑我雖歸似不歸。

為君不惜送行詩，但恨蒹葭失所依。  
流水盡朝東海去，孤雲只向太行飛。  
仕途永炭收心早，客路參商見面稀。  
一曲陽關歌未徹，聲聲頭上聽催歸。

遙指東山去，恨遲爭如蓮幕早。  
來依須知宋鷗猶能退，有底齊禽尚不飛。  
洛下書生憐我少，燕南壯士似君稀。  
主人好客厭厭醉，正要髭留肯放歸。

赴山陽

寄君祥濟之  
仲寬子昂

立馬西風不忍行  
往回只是片時程  
一年又作半年客  
百里有如千里情  
落日寒林山下路  
淡烟疎竹水邊城  
願君把酒休惆悵  
四海由來皆弟兄

白文舉王百一索句送行

世事紛紛亂似麻  
不堪愁裏度年華  
傷心城郭來家鶴  
過眼光陰赴壑蛇  
彈鋏歌中成老境  
班荆話後各天涯  
何時造物歸真宰  
却覩人間第一花

承二公寵和復用元韻二首

脫却朝衫著紵麻，殘年猶復夢京華。  
世情共指鹿為馬，天意反教龍作蛇。  
白髮不公人易老，青山有素恨無涯。  
那禁送別東郊外，滿目離離濺淚花。

有客衡從說莩麻，要教身後見西華。  
若為養得能言鴨，未解除他引睡蛇。  
歸去稍知閒氣味，荒唐猶種老生涯。  
眼前浮世憑誰問，獨倚東風看落花。

和東庵孔安道韻

擬結閒中一草堂此心安處即吾鄉須知見在身為患  
見說長生藥有方老去看書徒引睡愁來得句不成章  
從前習氣都除盡待與高人論坐忘

和子榮

暫使彭宣到後堂安昌只以醉為鄉浮雲世事日千變  
流水生涯天一方老子興雖如庾亮故人恩不減蘇章  
能消幾兩尋山屐回首狐丘本未忘

籌堂壽日二首

此生但覺醉鄉寬

王績

誰謂蜻猶北海螭

王猛

處處相迎皆

倒屣

王符

人人共喜欲彈冠

王陽

州應向日懸刀夢

王濬

山試

今朝拄笏看

王猷

仙馭未來縵氏鶴月明吹徹玉笙寒

王喬

烏衣歷歷是名家人物於今比晉多俗論不侵揮麈話

行壯懷多付缺壺歌

王行

雖無金埒堪調馬

王濟

賴有黃

濟

庭可換鵝

王羲之

見說長江欲飛渡

王濬

那須永合望滹沱

王霸

用子榮河橋送別韻

河橋把酒不成歡，正是離人去住間。  
公道幾時饒白髮，世情今日看青山。  
娟娟明月無家對，慘慘孤雲待我還。  
慚愧殷勤花裏鳥，一聲聲送出陽關。

承徐子賢賈仲常張伯英寵和復用韻

天涯盃酒強追歡，白髮光陰轉首間。  
獨夜夢魂千里月，暮年心事數重山。  
回腸都為愁將斷，行腳猶疑債未還。  
儻得一廛休老地，柴門今後定牢關。

宿邨舍四首

別後曾無一日歡風流都在落花間  
眼青羞對門前柳頭白相驚雪裏山  
華表鶴來猶是客烏衣燕去不知還  
森森庭院荒荆棘虎豹窺人夜撼關

握手親情有底歡疎籬茅舍兩三間  
尚憐作者千年調那肯分人一半山  
安得意如張翰適憑誰放取浩然還  
得君斗酒須防客不怕重門更著關

坡云重門著關不為君正恐惡客來

仇餉

懷抱何曾得少歡春愁飛上兩眉間一瓢漫酌獨清水

幾屐能窮無盡山見說酒兵常日備

江詒議酒猶兵也可千日不用不可

一日不備酒可千日不飲不可一飲不醉

未知詩債幾時還須防別後將軍

樂不待尋盟輒斬關

三兩殘盃不盡歡強陪年少貴游間客中未必常為客

山上那堪復有山鶴髮都從愁裏變貂裘直待醉時還

一朝却入龐公市驚倒城門老抱關

坡云城門抱關卒怪我此重游

憫董用之

怪底年來懶下帷似嫌膀尾姓名題一枝自謂烏難借  
百里誰知鳳膏棲頗訝生前徒強項未應老後不然臍  
試將點檢平時友大半佳城在馬蹏

悼壽堂

霞鞍金轡紫絲條玉帶紅靴織翠袍  
赴少年真手臂津津玉氣見眉毫  
不愁造化功難補可惜秋山勢自高  
那免牛車身後患一場春夢亦徒勞

送趙慶之赴邠州

且莫怱怱數去程一壺別酒為君傾三年簿領妨行樂  
十里溪山管送迎湓浦蘆花風裏恨渭城柳色雨中情  
三峯無復同州看休著新詩笑不平

和子搢來韻

新年桃李似無情回首繁華一夢驚點檢青氈非故物  
等閒傾蓋昧平生雨中燕子還留客風裏楊花欲送行  
試聽東流橋下水向人時作斷腸聲

和河上修橋二首

日日相陪杖屨游往來林下亦風流雲間隱隱堆螺髻

雨後鱗鱗漲鴨頭休恨臨津

臨津河

經始晚且看利涉

河橋

名落成秋尋常公事閒中了詩債如何尚不酬

落魄天涯頗倦游片帆歸去得安流幾年無事誇犀首  
一旦封侯看虎頭飛將正當南渡日拾遺還是北征秋  
龍鍾不稱凌烟像只有山林志可酬

壬寅九日同史正之劉濟之君祥仲寬姚子昂東  
城小酌寄錦堂王君玉

興來落筆任橫斜坐上朋儔續續加貌似葉紅皆被酒  
頭如雪白也簪花金風漸急秋將暮玉樹相依客盡嘉  
醪酹入城扶不去臨街下馬是誰家

和子榮悼恒山韻

功名人比漢淮陰猛虎俄因犬輩擒星落旄頭兵似火  
雲屯細柳士如林豈期虞虢乖脣齒漫倚良平作腹心  
灑盡英雄憂國淚變風那得不傷今

恒山謂恒山公武仙其次首云唐

外望歸藩鎮漢室中興仰羽林又剛忠公一首云斷頭  
那肯降朱泚血指誰思滅賀蘭皆為汴京之亂言之也

送別曹漢卿

馬上功名奈老何出門無地不風波  
憑誰試著回天力有客空揮却日戈  
青眼乍驚行處少赤心常笑話中多  
愁人近亦無腸斷又聽離筵送別歌

暮春和端甫韻

并序

暮春索詩且以不能陪郊外之游為恨

雨夕風朝樂事妨老來猶自為花忙  
春光一歲只三月樽酒百年能幾場  
辛苦衙蜂輸密課等閒巢燕得泥香

如何復共遨頭醉待把銀瓶指點嘗

調祁定之

風埃滿面髮蓬垂欲學喬松久遠期浮世幾場漂杵血  
流年一局爛柯棊不須玉女引巢父那在神官邀退之  
果待吹噓送天上人間事了未為遲

和述懷二首

簪履三千氣壓齊寒林那羨一枝棲坐中有客鵬將賦  
門外何人鳳欲題酤酒未嘗防惡犬著鞭寧復待荒雞

夕陽休凭欄干望今日長安不在西

擬將齊物物難齊惟有山林跡可棲身望鳳池慚不到  
名登鴈塔愧先題未能忘舊歸家鶴長是思鳴失旦雞  
天為東周道垂喪肯生夫子在關西

答子榮

行藏事拙且乘流游徧人間老即休多汗愈膚三伏暑  
漸衰潘鬢一時秋風高勢欲欺茅屋雨急聲疑在竹樓  
今世宦情何處好但憂無蟹有監州

即事

鐵馬長驅汗血流  
眼前戈甲幾時休  
誰能宰似陳平社  
那免悲如宋玉秋  
漠漠微涼風裏殿  
蕭蕭殘夜水邊樓  
千邨萬落荒荆棘  
何止山東二百州

寬張文玘

怪來久不造龍門  
依舊相逢一笑溫  
任把錦囊嘲李賀  
休將布鼓詫王尊  
事隨勢過心猶駭  
言與時違舌可吞  
誰為書生肯推轂  
綈袍且念故人恩

讀五代史

破却千金築一臺折衝閫外望人才中原山嶽河分斷  
塞上牛羊草引來西海正驚天狗墮北人忽擁帝羆回  
猶憐仙掌英靈在誰把潼關閉不開

索和長平諸詩友送行韻信筆奉呈君玉閨之賓  
客中一笑

漢厦非無論道壇自慚老去鬢皤然閒愁似海藏皮裏  
往事如風過耳邊幾度班荆誰與話一朝傾蓋總相憐

柴門近日多來客火速移牀待孝先

昨晚蒙降臨無以為待早赴院謝聞已長往何行之速也因去人寄達少慰客中未伸之志耳

書生掉舌豈其時手底青編亦倦披鐵鎖尚沈江漠漠  
銅駝又沒草離離陰山路上明妃曲天寶年中杜甫詩  
古往今來幾興廢白頭恨見太平遲

送郡侯段正卿北行二首

征途萬里朔風寒過盡陰山復有山歲既在於辰已後

星多客向斗牛間漫漫積雪無冬夏劫劫飛鴻自往還  
若到龍庭試回首太行一片白雲閒

獵獵霜風墮指寒一鞭行色抵天山馬嘶衰草孤烟外  
鴈沒長空落照間入塞盡穿羶帳過去鄉須待錦衣還  
功名大抵黃粱夢薄有田園便好閒

杜門

近來人事頗相乖獨坐何曾得好懷犬吠為連酤酒市  
雞鳴長傍讀書齋門終待學張家塞闥恐難當噲等排

惡客就中多氣岸時時下馬繫堂階

中秋

露下天街一氣涼月明不復被雲妨  
正當金帝行秋令疑是銀河洗夜光  
鮫室影寒珠有淚蟾宮風散桂飄香  
席間醉客忙歸去獨共三人盡此觴

代樂仲和張溫甫處督米

未必書生氣盡寒食常不足為居間  
清於孺子滄浪水瘦似詩人飯顆山  
欲向田文彈鋏去恐因丘嫂頡頏還

聞君自有江湖量，肯為枯魚少破慳。

和王季文襄陽變後二首

逐鹿中原未識真，指蹤元自有謀臣。  
虞全不念屠亡國，楚恐難當舌在人。  
拔劍挽回牛斗氣，舉鞭感起漢江塵。  
相逢空灑英雄淚，誰是荊州一角麟。

天命須分偽與真，銜蜂戰蟻盡君臣。  
蛟龍不是池中物，燕雀休嗤壘上人。  
衣不能勝絙，紹血扇無可奈庾公塵。  
自從絕筆春秋後，誰復傷時為泣麟。

一字題示商君祥

并序

余年三十有九遭甲戌之變乙亥秋七月南邁時姪謙甫主河南福昌簿迎至西山僑居廳事之東齋小學師商君祥投詩索和頃刻間往回數十紙謙甫曰一鼓作氣未可敵姑堅壘以待姪壻郭鴻漸曰可以單師挫其銳乃出百字題請賦以酬之遂信筆而書殊無意義付其徒孫男樂山示之三日不報謙甫笑曰五言長城不復敗攻也君祥於是攜酒來乞盟大

會所友極歡而罷

雲

早艣將為虐從龍便出山人間三尺雨命駕早知還

雨

晚有來蘇意憂深望歲人一犁雖美滿猶恨不當春

塵

不憂懸榻室可奈汙人風踏破青鞵底猶疑是軟紅

春

來莫愁春遲去莫怨春忙春不隨人老誰教汝斷腸

梅

未報江南信先開雪裏邨要看花上月立馬待黃昏

松

鬱鬱愁無地青青獨有心疑從大夫後傾蓋到如今

竹

瀟灑能醫俗檀欒看上番我寧負此腹忍使籜龍冤

蜂

弄晴沾落絮帶雨護園花有課常輸蜜無春不到衙

僧

貌與松俱瘦心將絮共沾一庵空寂地香火讀楞嚴

漁

一聲歌欸乃萬頃國烟波螯蟹中間醉蓑衣拜浪婆

樵

雲外山將遍人間日易斜不知棊換世柯爛未還家

硯

端溪溫潤石價重百車渠一滴玄潭水蠅頭萬卷書

香

小炷博山鼎半殘心字灰游蜂何處客應為百花來

隱

孔負二宜去嵇知七不堪青山休老地佳處是終南

壽

灰如戀關心雪似窮經首問年今幾何看飲屠酥酒

行

水笑盃猶渡山驚錫尚飛  
垂垂瓶鉢老何處未來歸

住

俗尚家靈運誰堪社遠公  
空山雲不出愁殺渡溪風

飲

竹葉盃中醪金釵坐上春  
淺斟低唱境猶道是麤人

嘯

成瑨風生坐孫登月滿臺  
東皋今寂寞元亮早歸來

愁

解使回腸斷能催兩鬢秋天涯未歸客容易上眉頭

十六日夜戲書

貧作

臧祚切

梅花夢都忘柳絮禪可憐人與月不似夜來

圓

老杜醉歸圖二首

尋常行處酒債每日江頭醉歸薄暮斜風細雨長安一  
片花飛

百錢街頭酒價寒驢醉裏風光莫傍嚴公門去恐猶恨

在登牀

卜居

東鄰西舍兩三家  
簌簌牆頭落棗花  
慚愧畫梁雙燕子  
笑人今日又天涯

和籌堂途中即事

晚風吹雨過山堂  
燈火秋涼好對牀  
却被荒雞笑人懶  
一聲催起著鞭忙

過雲臺

夜半風吹霽色開曉來殘月過雲臺連山斷處瞰平野  
一線黃流掌上來

濟源龍潭

塵世悠悠不識真一潭春碧養潛鱗可憐無故驚雷起  
誤却山前失筍人

雨後

春空靄靄暮雲低飛過山前雨一犁明日却尋歸去路  
馬蹏猶踏落花泥

阻風

東風作惡幾時休  
況值春光欲盡頭  
誰謂閒人無箇事  
一年長是為花愁

明皇擊梧桐圖

不使梨園弟子知  
太平音在鳳凰枝  
一朝野鹿銜花去  
長恨秋風落葉時

陽關圖

一杯送別古陽關  
關外千重萬疊山  
試問青青渭城柳

不知眼見幾人還

千里江山圖

筆下江山取意成一峯未盡一峯生憑誰試向行人問  
水郭烟邨第幾程

雪後送寶泉之碧落

酒面輕風不作寒天花散落滿人間殷勤行腳休辭遠  
出得城門是雪山

和王成之梅韻

朝來一雪霽晴沙行到前村始見花  
驛使便將春色去  
暗香今夜落誰家

下太行

山中日日伴雲閒  
不見閒雲只見山  
君去試從山下望  
青山却在白雲間

東山道中

採遍山城草木芽  
百年老樹盡枯查  
眼前多少閒田地  
雨後春耕有幾家

太平泉

試從澗底覓根源  
剔蘚剜苔得舊泉  
人事盡隨流水去  
幾時復見太平年

十七日送行

忽忽又別故園春  
花落猶隨馬後塵  
相對離筵莫惆悵  
送行人是欲行人

寄別

馬蹏踏破亂山青  
送客風回酒半醒  
歸客莫將雲外指

大都一十五長亭

孟浩然圖

却因明主放還山  
破帽騎驢骨相寒  
詩句眼前吟不盡  
北風吹雪滿長安

夜夢月下與數仙子酌酒仍各賦詩

天風一掃暮雲開  
收拾羣仙共酒杯  
但指今宵是新月  
不知曾照古人來

和平太行路韻

鑿開險阻若天成  
暫使時間眼界平  
却羨長安西去路  
青山不管送人行

和君瑞月下聞砧

夜涼枕上夢頻驚  
有底秋天不肯明  
老眼近來閒淚少  
那禁月下擣衣聲

香梅二首

鄧妓之小字匠手有詩  
邊仲寧索和因用其韻

被誰說破夢中梅  
應有羅浮倒挂來  
祇為怕愁貪睡後  
返魂纔向北枝開

一枝瀟灑隴頭香分付新愁竹葉觴紙帳不須尋短夢  
天涯倦客已無腸

魏徵

立朝讜議盡良規誰使君王死後疑一旦鑿輿渡遼水  
即時扶起墓前碑

王庭秀悠然軒

小軒開後快雙明峭拔南山立翠屏好是晚來新雨過  
白雲堆裏露尖青

留別

主人把酒再三留送客風高勢未休更聽愁眉歌一曲  
樽前腸斷小溫柔

寒食戲書

驚見花間弄藥回同心髻綰綠雲堆多情更有牆東月  
送得秋千影過來

周昉內人圖

倦繡

心情猶在未收時却顧花間影漸移不道春來添幾線  
日長只與睡相宜

擣衣

一夕秋風鴈過聲鐵衣辛苦向邊城將軍不用和戎計  
雙杵休辭月下鳴

按樂

倚風無力見溫柔初下喧天羯鼓樓猶向花陰理新曲  
君王不惜錦纏頭

覽鏡

不教朱粉汙天真長對菱花顧影頻  
但把蛾眉掃來淡尚嫌不似號夫人

襄陽咏史

漢高廟

在襄陽縣西南鍾山

垓下未聞歌散楚澤中已見哭亡秦  
乾坤到底歸真主愁殺鴻門碎斗人

光武廟

在襄陽東四十五里光武南陽棗陽人今棗陽縣是也棗陵在棗陽東望氣者

蘇伯阿至南陽逢見春陵日氣佳哉鬱鬱蔥蔥  
蔥光武始起兵還春陵望舍南火光燭天今

襄陽在襄陽  
東界六十里

海內英雄待一呼雲龍際會入東都羯奴不識真人事  
微幸中原欲竝驅

宋玉宅

在宜城縣

離騷經裏見文章水綠山青是楚鄉往事一場巫峽夢  
秋風搖落在東牆

關將軍廟

在襄陽南九里鳳林關

鼎足相吞勢未分誰能傾蓋得將軍曹吳不是中原手  
天下英雄有使君

劉表祠

祠前有墓在府城東門內

天運端能卧可收江山形勢數荆州當時若聽韓嵩策  
那得曹瞞享士牛

曹操與袁紹相持於官渡韓嵩說表起乘其敝表不從操征表表之子琮

竟以荆州降

鳳林

孟浩然故居在襄陽縣南十里

天寶詩人去却回果曾北闕上書來若為耆舊無新語

明主何嘗棄不才

張參議有云朝家強欲相牽率豈識先生玩世心

杜甫故里

杜易簡預之遠裔有從弟曰審言生子間間生甫世居襄陽甫徙家華縣

不知故隱幾時離天寶年間處處詩過客不須尋世譜

萬山山下看沈碑

杜詩吾家碑不昧王氏井依然注杜預沈碑岷山之下

集古

寒食席次

鞦韆打困解羅裙

韓偓

把酒相看日又曛

韓莊

處士不知平

峽夢

蓮花奴

春來猶見伴行雲

韋氏子

惜花

繡轡香羈夜不歸

崔塗

看花只怨看來遲

韓偓

今朝幾許風

吹落

楊巨源

多在青苔少在枝

崔櫓

春怨

已恨東風不展眉

段成式

落花惆悵滿塵衣

趙南渭

與君試

向江邊覓

東坡

得淒涼索漠歸

吳融

贈別二首

洞庭風軟荻花秋

鄭德璠

客散江亭雨未休

岑參

南去北來

人自老

杜牧

此中離恨兩難收

魏野

誰家紅袖倚江樓

杜牧

白袷行人又遠游  
甫今夜不知何

處泊

權德輿

青山萬里一孤舟

劉長卿

### 送客之荆南

千山紅樹萬山雲

韋莊

山鳥江楓得雨新

雍陶

我自飄零是

羈旅

東坡

不堪仍送故鄉人

顧非熊

### 聞角

鐵馬孤裘出漢營

常建

瘴雲深處守孤城

劉禹錫

無端遇著

傷心事

吳融

鳴軋江樓角一聲

杜牧

春夜

春風二月落花時

武元衡

憶得前年君寄詩

崔道

共道人家

惆悵事

牛僧孺

向燈彎盡一雙眉

韓偓

送客之南宮

蕭蕭風竹夜窓寒

武元衡

書劍催人暫間

杜巖

對酒已成

千里客

盧綸

斷腸聲裏唱陽關

李商隱

夜集

金鳳羅衣濕麝薰

韋莊

裝成掩泣欲行雲

戎昱

傍人未必知

心事

劉阜

一曲狂歌酒百分

高駢

戲書

春風何處有佳期

武元衡

花滿西園月滿池

高駢

料得也應

憐宋玉

李商隱

東鄰牆短不曾窺

段成式

柳

還到春時別恨生

張泌

渭城朝雨裊輕塵

王維

自家飛絮猶

無定

羅隱

不解迎人只送人

皇甫冉

醉眠

糝逕楊花鋪白氈

杜子美

日西鋪在古苔邊

王建

滿山明月

東風夜

韓偓

留與遊人一醉眠

鄭谷



御訂全金詩增補中州集卷四十四